

雲
麓
漫
鈔

二



雲麓漫鈔

(二)

趙彥衛書

王雲五主編

叢書集成初編

雲麓漫鈔
二冊

中華民國二十五年十二月初版

著者 趙彥衛

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

叢書集成

初編

主編 王雲五

商務印書館發行

雲麓漫鈔卷第八

雲麓趙彥衛景安

余外舅家收柳公權親筆啟草二紙皆小楷字僅盈分而結體遒媚意態舒遠有尋丈之勢紙長不過七寸廣亦如之及中興重興秘省賀方回之子首以獻書得官秦太師付以按訪遺逸外舅之兄張公觀言以所得託賀納之秦府秦進之上方張自待次虔州瑞金簿易監文思院其季復以所得投之中人引秦事爲證亦歸於天上獨外舅兩啟尙存云上翰林柳學士璵某謬至顯榮皆承闕乏昨者璽書慰勉蘭省遷超雖上意欲壯於軍威在外臣轉深於官謫此皆學士曲垂獎會潛爲扶

持繼音容於北風爲主人於東道況兼姻媾早接清華
推魏公感外家之情用何氏奉諸姨之敬念深外妹亦
愛愚夫不然則安得道已隔而分更敦官轉尊而志愈
下藏之不忘佩以彌芳思奉冰霜邈同雲漢仰計亘霄
路於高閣隔人烟於禁垣嘯傲霞高從容日近閒揮綵
筆時弄紫泥益彰叔則鸞鶴之姿轉映王恭神仙之狀
便當乘風浩氣濯弄瑤池秉陰陽之鑑鍾輔天地之橐
籥異時獲賜今日先知瞻望風猷常在魂夢某再拜又
侍郎頡頏重霄騰凌迴漢刻名仙館絕跡人寰潤飾洪
猷承迎中旨金莖瑞露雲表先嘗玉輦靈桃窗間暗識
方茲獨步誰敢爭衡況藝奮神工時推妙翰鳳鸞異態

龍虎殊姿白首何人墨池誰子後生是畏前聖有言若
非思與神疑韻無俗累則安能致茲道逸迢彼等夷窮
鍾蔡之楷模入王羊之閭域往者韋相公嘗謂侍郎能
以書諫者今則行執陶鈞坐登台輔終提一筆以絕百
僚後命之來延頸而俟某素無勲效叨濫寵榮一授藩
垣兩遷官秩猶以處牀操扇粗識孤虛跨馬彎弓未爲
遲暮誓將丹懇以奉休明所冀侍郎猥錄孤微終垂庇
遇使其晚節無媿平生下情云云前輩俱跋爲柳筆然
非柳亦不能造此但啟中有筆諫之語豈它人上柳啟
柳自書之耶當有辨之者

近世行狀墓誌家傳皆出於門生故吏之手往往文過

其寔人多喜之率與正史不合如近日蜀本東都故事
趙普傳與正史迥然如兩人正史幾可廢前輩嘗以邵
氏聞見錄與石林避暑燕居錄等以歲月參之皆不合
汪彥章集有題陳文惠公逸事後云文惠陳公之相仁
祖每內批夜下不過十刻一日夜分有御封至公不啟
封來日袖進曰今中宮虛位張貴妃有寵恐姦人附會
請正母儀非出陛下本意也仁祖首肯曰姑置之貴妃
卽進冊溫成皇后也當時墓碑不敢書公之曾孫衰始
錄以示人按李氏長編辨此事云文惠公以景祐四年
拜相寶元元年三月罷溫成以康定元年十月自侍御
選才人距文惠罷相凡三年餘雖當時已被寵幸不應

諛臣便有正位中官之請汪所見袁說非事實也其它
往往類此

漢刺史以八月巡行所部歲盡詣京師奏事不言所處
之地唐戴叔倫撫州刺史廳壁記云漢置十三郡刺史
以察舉天下非法通籍殿中乘傳奏事居靡定處權不
牧人其言必有據又江西節度觀察判官壁記云開元
二十年四方都會之州各置採訪使以總覆四按察之
任使臣有土自此始也乾元二年天下聚兵罷採訪而
加防禦尋代之以專征而討逆伐叛則以節度主之其
間復置觀察而悉與三使並唐書載建置領不詳故併
記之

唐之舉人先藉當世顯人以姓名達之主司然後以所業投獻踰數日又投謂之溫卷如幽怪錄傳奇等皆是也蓋此等文備衆體可以見史才詩筆議論至進士則多以詩爲贄今有唐詩數百種行於世者是也王荆公取而刪爲唐百家詩或云荆公當刪取時用紙帖出付筆吏而吏憚於巨篇易以四韻或二韻詩公不復再看余嘗取諸家詩觀之不惟大篇多不佳餘皆一時草課以爲贄皆非其得意所爲故雖富而猥弱今人不曾考究而妄譏刺前輩可不謹哉

本朝之文循五代之舊多駢儷之詞楊文公始爲西崑體穆伯長六一先生以古文倡學者宗之王荆公爲新

經說文推明義理之學兼莊老之說洎至崇觀黜史學而中興悉有禁專以孔孟爲師淳熙中尙蘇氏文多宏放紹熙尙程氏曰洛學

景祐元年四月間上謂宰臣曰近年以來陰陽不順卦氣乖舛此必應天之道有未合于天心而違於人意者宜推明咎徵之本臣僚上言早歲陳彭年等定中外醮儀列聖祖天尊在北極之上伏緣北極大帝總領萬物主宰中極而聖祖司命真君因薦尊號驟居紫微帝君之上旣定位非順自茲天下郡縣多致災傷伏望重行詳定禮院詳定當院與道衆參詳天下道觀聖祖每遇醮設於本殿供獻則聖祖天尊及六位仙官卽與衆真

各無相妨仍別用青詞奏告如無聖祖殿處卽別設醮位爲便從之後道士欲得山聖祖雜於其間以重其教復合之自渡江後朝廷作醮亦從其說老氏之教本以清虛淡泊爲本五千文不可易也故竇太后漢文帝用之皆能治國外又有方士神仙家祠官太祝與夫按摩導引書符呪水史記皆以家名初未嘗合也秦皇漢武始好神仙方士祠祀始有觀始皇曰我慕真人自謂真人不稱朕乃令咸陽旁二百里內宮觀二百七十複道相通於此候神仙漢武故事於上林作飛廉觀高四丈長安作桂觀益壽館以候神人猶未居道士元帝被疾遠求方士漢中送道士王仲都能忍寒遂卽昆明觀

處仲都故自後道士所居曰觀六朝多曰館亦武帝故事後魏嵩山道士寇謙之修張道陵之術以其教太冷淡無所得自言遇老子降授以辟穀輕身之法及科戒二十卷崔浩師事之始合爲一已見通鑑唐置崇元學專奉老氏配以莊列道家者流以謂天地未判有元始天尊爲祖氣次有道君以闡其端老子以明其道老子乃李氏之祖取郊祀配天之義以尊之號曰三清然未嘗殿而祀之至本朝更定醮儀設上九位失於詳究以昊上帝列於周柱史之下故在景祐有此施行謂宜倣效景祐之制少變之奉三清於殿以爲教門之祖若醮則祭昊天上帝於壇以爲百神之宗庶不失崇敬之義

亦唐崇元學之舊醮議當更爲奏章之制而去其邀迎之僭庶景貺來臨矣

姓氏後世不復別但曰姓某氏雖史筆亦然按史記帝紀注引春秋左氏無駭卒羽父請諡與族公問族於衆仲對曰天子建德因生以賜姓胙之土而命之氏諸侯以字爲諡因以爲族官有世功則有官族邑亦如之公命以字爲展氏注者云天子賜姓命氏諸侯命族族者氏之別名也姓者所以統繫百世使不別也氏者所以別子孫之所自出解春秋者云因生以賜姓者謂若舜之媯禹之姁伯夷之姜是已胙之土而命之氏者若舜之有虞禹之有夏伯夷之有呂是已於字則叔牙季友

展無駭臧僖伯是已於謚則文武成宣宋戴惡衛齊惡是已氏於官則司馬司徒之類是已氏於邑則韓魏趙是已詳此諸侯旣命於天子爲某公侯則是命之氏諸侯位卑不得賜姓其有以王父及以字爲氏或以官以邑旣無土可分則姓與氏無別注史記者所以有族者姓之別名之語姓者統百世如周姓姬氏所以別子孫如魯衛毛聃邰晉應韓之分又春秋之時諸侯之子爲大夫則稱公子孫則稱公孫公孫之子與異姓之臣未賜族而身爲大夫則稱名無駭俠之類是也已賜族而使之世爲大夫則稱族如仲孫叔孫季孫之類是也此諸侯不得命氏而得命族之例也從可知矣若夫易云

黃帝堯舜氏作堯舜雖非姓氏既是天子當一代稱曰堯舜氏義亦通此又不拘姓氏之例也

後漢徐穉子傳云家貧常自耕稼非其力不食恭儉禮遜所居服其德屢辟公府不起時陳蕃爲豫章太守以禮請爲功曹穉既謁而退蕃在郡不接賓客唯穉來特設一榻去則收之及陳蕃傳不書此事卻云蕃爲樂安太守郡人周璆高潔之士前後郡守招命莫肯至唯蕃能致焉字而不名時爲置一榻去則收之璆字孟玉臨濟人有美名而司馬溫公通鑑亦祇書徐穉事不及周故周璆之名益不顯細考之蓋陳蕃能尊敬賢士爲豫章太守則下徐穉之榻爲樂安太守則下周璆之榻

范曄不能發明之耳

正月旦日世俗皆飲屠蘇酒自幼及長或寫屠蘇千金方屠蘇亦不知何義按梁宗懷荆楚歲時記云是日進椒栢酒飲桃湯服卻鬼元敷於散次第從小起注云以過臘日故崔寔月令過臘一日謂之小歲又云小歲則用之漢朝元正則行之晉世蓋漢嘗以十月爲歲首也又云敷於散卽胡洽方之許山赤散並有斤兩則知數于音訛轉爲屠蘇小歲訛而爲自小起云

自東京至女眞所謂御寨行程東京四十五里至封丘縣皆望北行四十五里至胙城縣腰頓四十五里至渡河沙店四十五里至滑州館二十五里至濬州七十里